

Governu aprova tetu agregadu OJE 2023 biliaun \$1,8



Primeiru-Ministru, Taur Matan Ruak prezide Reuniaun extraordinária Konsellu Ministru. iha Palásiu Governu, segunda (18/07). Imajen Tatoli /Egas Cristóvão

DILI, 18 julu 2022 (TATOLI)–Governu liuhosi reuniaun Konsellu Ministru (KM) estrordinária, kuarta ne'e, aprova tetu agregadu Orsamentu Jerál Estadu (OJE) 2023 ba Administrasaun Sentrá ho montante biliaun \$1,8.

“Konsellu Ministru estrordináriu halo aprovasaun ba montante totál despeza ba kada títilu orsamentál tinan 2023, hafoin iha loron hirak tuir mai maka sei halo diskusaun tékniku filafali atu iha montante finál,” Ministru Prezidénsia Konsellu Ministru, Fidelis Manuel Leite Magalhães, relata, hafoin ramata reuniaun ezekutivu ne'e, iha Palásiu Governu, kuarta kalan.

Tetu Agregadu biliaun \$1,8 ne'e esklui ona Fundu Kombatente Libertasaun Nasionál (FKLN) biliaun \$1, Orsamentu Seguransa Sosiál millaun \$235,7 no Rejiaun Administrativa Espesiál Oé-cusse Ambeno (RAEOA) millaun \$120.

Nune'e, totál despeza globál ba OJE 2023 mak biliaun \$3,15.

“Biliaun \$3 ne'e la'ós atu sai hotu, maibé ne'e inklui ona biliaun \$1 ba fundu veteranu, atu efeitu kontabilístiku kada tinan ne'e, biliaun \$1 tenki temi hela de'it tanba ne'e biliaun \$1 ita tau sees tiha hodi rezerva hela ba veteranu sira. Despeza ne'ebé sei uza ba tinan oin ne'e besik biliaun \$2,” nia akresenta.

Portavós Governu esplika, iha Lei Grande Opsaun Planu (GOP) estabese ona katak montante despeza globál ba 2023 hamutuk biliaun \$3,155.

Orsamentu ne'e sei uza hodi finansia programa 45 liuhosi atividades prinsipál 275, organizadu iha área estratéjiku 16 ne'ebé Governu sei foku ba iha tinan oin hanesan agrikultura, pekuária, peska no floresta, ekonomia no empregu, turizmu, dezenvolvimentu rurál no abitasaun, ambiente, petróleu no minerál, eletrisidade no enerjia renovável, konektividade nasional, bee no saneamentu, edukasaun no formasaun, saúde, inkluzo no protesoun sosiál, kultura no patrimóniu, reforma Estadu, defeza no seguransa nasional, relasaun internasionál no polítika esterna.

Aleinde ne'e, distribuissau tetu agregadu orsamentu Administrasaun Sentrá iha OJE 2023 bazeia ba setór importante sira iha Planu Estratéjiku Dezenvolvimentu, ba setór enkuadramentu institusionál hetan alokasaun 38%, tuir kedan ho kapitál sosiál 33%, dezenvolvimentu infraestrutúra 22% no dezenvolvimentu ekonómiku 7%.

Ho aprovasaun ne'e, Ministériu Finanzas sei fó sai sirkulár kona-ba regra elaborasaun OJE 2023 no distribui envelope fiskál aprova ba entidade Estadu hamutuk 109 ne'ebé mak hola parte iha perímetru orsamentál 2023.

Ba oin, KM mós sei aprova alokasaun orsamentu tuir programa no Proposta Projetu Lei (PPL) OJE 2023 no sei konklui ho entrega PPL OJE 2023 ba Parlamentu Nasionál iha fulan-outubru atu hetan aprovasaun molok haruka ba Prezidente Repúblika atu tetu iha tinan ida-ne'e nia rohan.

Kalendáriu ne'e tuir ona espíritu lei foun Enkuadramentu Orsamentál ne'ebé mak promulga ona iha fulan-fevereiru liubá, ne'ebé lei estruturante ne'e sai nu'udar baze ida ba Reforma Jestaun Finanseira Públika.

Jornalista : Antónia Gusmão

Editora : Julia Chatarina

Ministro das Finanças, Rui Augusto Gomes liu Facebook

Governu Aprova Tetu Agregadu OJE 2023 Billiaun \$1,8 -- Menus 18% kompara ho OJE 2022

Díli, 19 jullu 2022 – Iha Sorumutuk Estraordináriu, horiseik, Konsellu Ministrus aprova ona Tetu Agregadu orsamentu Administrasaun Sentrái iha OJE 2023 ho montante totál billiaun \$1,8. Montante ne'e hetan redusaun 18% ka millaun \$390 kompara ho OJE 2022.

Tetu Agregadu billiaun \$1,8 ne'e esklui Fundu Kombatentes Libertasaun Nasionál (FKLN) billiaun \$1, Orsamentu Seguransa Sosiál millaun \$235,7 no RAEOA millaun \$120.

Totál Despesa Globál ba OJE 2023 mak billiaun \$3,15. Montante ne'e inklui ona orsamentu Administrasaun Sentrái, FKLN, Seguransa Sosiál no RAEOA no hanesan ho montante Despesa Globál iha Lei das Grandes Opções do Plano 2023 ne'ebé mak Prezidente Repúblika, Dr. José Ramos-Horta promulga ona iha fulan kotuk.

Orsamentu ne'e sei uza hodi finansia Programa 45 liuhusi medidas ka atividades prinsipál 275, organizadu iha área estratéjiku 16 ne'ebé Governu sei foku ba iha tinan oin: Agrikultura, Pekuária, Peskas no Floresta; Ekonomia no Empregu; Turizmu; Dezenvolvimentu Rural no Abitasaun; Ambiente; Petróleu no Minerál; Eletrisidade no Enerjia Renovável; Konektividade Nasionál; Bee no Saneamentu; Edukasaun no Formasaun; Saúde; Inkluzsaun no protesasaun Sosiál; Kultura no Patrimóniu; Reforma Estadu; Defeza no Seguransa Nasionál; Relasaun Internasionál no Política Esterna.

Distribuisaun Tetu Agregadu orsamentu Administrasaun Sentrái iha OJE 2023 bazeia ba setór importante sira iha Planu Estratéjiku Dezenvolvimentu: Setór Enkuadramentu Institusionál hetan alokasaun 38% tuir kedan ho Kapitál Sosiál 33%, Dezenvolvimentu Infraestrutura 22% no Dezenvolvimentu Ekonómiku 7%.

Ho aprovasaun ne'e, Ministériu Finansas sei fó sai Sirkulár kona-ba Regras Elaborasaun OJE 2023 no Distribui Envelope Fiskál Aprovadu ba Entidades Estadu hamutuk 109 ne'ebé mak hola parte iha Perimetru Orsamentál 2023.

Ba oin, Konsellu Ministrus mós sei aprova alokasaun Orsamentu tuir Programa no Proposta Projetu Lei (PPL) OJE 2023 no sei konklui ho entrega PPL OJE 2023 ba Parlamentu Nasionál iha fulan-outubru atu hetan aprovasaun molok haruka ba Prezidente Repúblika atu tetu iha tinan ida-ne'e nia rohan.

Kalendáriu ne'e tuir ona espíritu Lei Foun Enkuadramentu Orsamentál ne'ebé mak promulga husi Prezidente Repúblika sesante, Dr. Francisco Guterres Lu Olo iha fulan-fevereiru liubá. Lei estruturante ne'e sai nu'udar baze ida ba Reforma Jestaun Finanseira Públikas iha país ne'e – konkista importante ida ne'ebé mak Oitavu Governu Konstitusionál lideradu husi Primeiru-Ministru, Jenerál Taur Matan Ruak halo durante nia mandatu. ***